

四庫全書

子部

欽定四庫全書

子部

居易錄卷二十三

詳校官侍讀<sub>臣</sub>陳崇本

員外郎<sub>臣</sub>牛勣文覆勘

總校官中書<sub>臣</sub>朱 鈐

校對官中書<sub>臣</sub>方大川

謄錄舉人<sub>臣</sub>范光謙

欽定四庫全書

居易錄卷二十二

刑部尚書王士禎撰

沙門自魏晉以來依師為姓道安尊釋迦乃以釋為氏  
後見阿含經云四河入海無復河名四姓沙門皆稱釋  
種自是遂為定式右沙門稱釋之始程大昌雍錄曰葱  
嶺之西餘國冠昭武為姓者皆釋種也錢湘靈釋迦方  
誌辨云釋種者即刹利帝王種釋姓最貴中天竺王奕  
世君臨居四天竺之會其散而之四方者王曰塞王民

曰塞種人引顏師古漢書注釋塞聲相近本一姓也

予昔使粵過韶州得曹溪誌讀之載靈通侍者事侍者嗜酒今銅像侍立祖肉身旁像頂布帽鄉人日盛一鉢酒供之供後酒化水布帽欹側考釋氏稽古錄侍者占城國王太子也父王遣太子及其臣五人來曹溪請六祖往彼國供養祖不許太子五臣俱立化於海濱今南華山門外有相公祠太子既化復現身為侍者獨不戒酒祖許之後得法去留一鉢寺中憨山大師入山為衆

授戒又為文啓祖座前使侍者斷酒因碎其鉢是後或以酒供之酒不成水帽不復側

曹溪有室女發願繡千佛衣一襲奉供憨山大師衣成而師已遷化衣留寶林庫及師肉身自廬山還曹溪出龕時紫繒羅衣見風而碎遂取此衣衣之光彩如新在庫已二十二年矣衆謂此女願力所致

二則記於此補  
皇華紀聞之缺

先十七從祖齊音有晏公廟詩自敘謂本江中棕繩為怪許旌陽以法印擊之中額遂稱正神云按國憲家猷

載猪婆龍事有老漁語衆云云問其姓曰晏也如其言  
上河江岸成太祖悟曰昔救我於覆舟山是云晏公遂  
封神霄玉府晏公都督大元帥命有司祀之不云棕怪  
也

予嘗疑晦菴議論多偏讀灼艾集益信其言曰朱文公  
談道著書百世宗之愚觀其評論古今人品誠有違公  
是而遠人情者王安石引用姦邪傾覆宗社元惡大憝  
也乃列之名臣錄稱其道德文章夫文章可也焉有引

用姦邪而可名為道德耶蘇文忠公文章忠義古今所  
共仰也乃極詆之謂得行其志其禍甚於安石以安石  
之姦則末減其已著之罪以文忠之賢則巧索其未形  
之癥不特此也秦檜之姦人皆欲食其肉者也乃稱其  
有骨力岳忠武之死人盡為垂涕者也乃譏之為橫漢  
儒董賈之流皆議其疵匡衡之言頗純粹無疵則云匡  
衡好懷挾其不成人之美例如此以至諸葛忠武侯則  
名其為申韓陶靖節則譏其為莊老韓文公則文致其

大顛往來之書疊疊千言必使之不為全人而後已古人云君子當於有過中求無過不當於無過中求有過朱子語錄論人皆於無過中求有過者也云云

宋吳處厚訐蔡確車蓋亭詩小人也又宋史直筆言其因神宗闕嗣上書請立程嬰公孫杵臼廟優加封爵語極不經然神宗納其言詔封嬰成信侯杵臼忠智侯立廟絳州其誕妄如此又按程篁墩集藏山在太原府孟縣北五十里春秋程嬰公孫杵臼藏趙孤於此故名旁



有聖水宋立廟乃在絳州與此異

八月初三日戶部左侍郎蔣宏道接出

上諭略曰朕撫馭寰宇早夜孜孜以實惠及民俾登  
康阜為念廣西四川雲南貴州四省俱屬邊地土壤  
磽瘠民生艱苦與腹內舟車輻輳得以廣資生計者  
不同朕時切軫懷歷歲以來屢施恩恤茲念育民之  
道無如寬賦矧邊省地方非再沛優恤之恩則閭閻  
無由充裕所有康熙三十三年四省應徵地丁銀米

著通行蠲免仍行文督撫徧加曉諭務令人沾實澤

以稱朕加惠遠省民生至意

廣西銀三十七萬有奇  
米七萬八千有奇四川

銀一十八萬八千有奇米一萬三千有奇雲南銀一  
十六萬九千有奇米二十八萬四千有奇貴州銀六

萬三千有奇米  
十萬五千有奇

咸和五年石勒稱天王奉佛圖澄彌加敬號曰大  
和尚今沙門出世領衆者例稱大和尚蓋自澄  
始

禮部題覆國子監請廣八旗中額疏查庚午順天鄉試

滿洲蒙古原取中舉人十名今增六名共取中舉人十六名漢軍原取中舉人五名今增三名共取中舉人八名辛未會試滿洲蒙古原取中進士四名今增二名共取中進士六名漢軍原取中進士二名今增一名共取中進士三名奉

旨依議自康熙三十二年癸酉科始

雲谿友議載李翱在潭州席上有妓舞柘枝者顏色憂悴問知為蘇州韋中丞女殷堯藩當筵贈詩云姑蘇太

守青蛾女流落長沙舞柘枝云云李乃於賓榻中選士而嫁之輟耕錄載姚燧官翰林學士日玉堂設宴歌妓中一人秀麗閑雅微操闔音叩之泣而訴曰妾建寧人真西山之後也遂白丞相三寶努為落籍嫁小史黃埭嘉興貝闕有詩記事云妾本建寧女遠出西山翁云云此皆好事者為之媚嫉君子污鱗大賢亦猶南渡小人傾朱晦翁至有帷簿不修之謗可謂無忌憚之尤者矣友議出范攄手鄙俚不足道陶宗儀元末名士乃亦爾

可怪也

律八議條下罪至死者唯云准犯依律合死不正言云云取自

上裁近自吏部侍郎胡簡敬貴州巡撫都御史衛既齊二案九卿詹事科道會議

上聞始變此例注云所以使應議之人咸知自重而不犯法也

九月十六日

上諭江浙二省今年憂旱雖不成災秋收量必有限若漕糧照常徵收起運恐民食將至匱乏朕為此常切軫念除浙江漕糧已經改于今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益著滿漢大學士等會同戶部堂上官倉場侍郎等作速確議具奏次日士禎同戶部尚書馬齊王鵬左侍郎蔣宏道總督倉場侍郎常書等赴內閣會議得江南

今年漕糧應遵

上諭蠲免十分之三先是三十年十二月奉

上諭遞蠲河南湖廣江西浙江安徽蘇松山東等各省  
漕糧今年已蠲江西漕米五十六萬三百石有奇嗣以  
浙江旱災部覆巡撫張鵬翮疏准將康熙三十三年之  
蠲免移於三十二年又蠲米七十萬四千九百石有奇  
江南又蠲三分之一上下江共計米五十四萬七千九  
百九十石有奇

浩蕩之恩振古罕覩漢之賜租何足道哉士禎適備員  
度支目覩

皇上憂民之切如此因恭紀以示後來

按各省漕糧額數每年共米三百五十六萬九千二百  
五十五石今康熙三十二年江西蠲米五十六萬三百  
七石零浙江預蠲米七十萬四千九百七石零江南預  
蠲三分之一計米五十四萬七千九百九十四石三省  
共約蠲一百八十一萬二千石有奇京通各倉現存歷



年支剩米八百三十萬五千五百二十石有奇每年應支官俸兵餉米計二百八十七萬五千六百石

陳君說康熙癸酉黃旗下一撥什庫家有一女年四歲矣女初生時其室書櫥中忽有金石絲竹之音日夜不絕屢延法師禳之不效是歲重九前女忽告其父母曰兒將歸矣遂示疾一日櫥中如搗鼓聲震動屋瓦疾風自內出舉家恟駭頃之女卒矣

癸酉鄉試江南以少詹事李錄予為正考前此所無

褚河南臨子敬十三行有宣和書寶後有清和堂圖書  
印晉府圖書之印內府書印鈐山堂印天籟閣小印尾  
又有晉府圖書之印

獻之洛神賦遺跡頭尾外得一十三行都二百字重加  
整背祥符八年八月十日周越記又括蒼周采觀熙寧  
十年九月廿七日三衢官舍書又梁邱孫亞夫熙寧丁  
巳仲冬十一日雙檜堂觀又建康王旂武林張彥中吳  
興茅鐔同觀於清心堂元祐丙寅秋七月二日又三茅

翁丁卯八月八日觀不書年號禾郡項氏故物也

癸酉夏鄒平民家婦薛氏者娠十二月矣腹中脹痛不可忍啾啾有聲日漸骨立臨蓐有物蜿蜒而下則蛇也凡下二十四其婦竟無恙前數年長山黃莊有少年入罾井探雀鰕得一卵含置於口其卵不覺嚥下久之腹中啾啾有聲見肉則吞啖不休食兼數人一日之舅家食肉畢倦寢儿上有餘肉舅見少年口中一蛇出半身直向盤中啖肉急掣之蛇墮地鬚髭毵可畏乃殺之少

年絕而復甦服藥半載始愈

以襄陽米水運至商州累民有

旨停罷

李厚菴光地司馬說泉州僧定因者膂力絕人尤精少林

拳棍弟子習其伎者數百人每有遠行輒煮米數斗盡

食之途中可數日不食時漳州有虎獐甚食人畜亡算

太守必欲殪之集兵士丁壯千人持利械以往虎負嶠

眈眈無敢近者定因適以事至衆望見之譟曰事濟矣

羣走告之定因曰殺虎易耳顧此虎非他比須鐵鈚五十斤者乃足制之耳遍試無當意者僅一纔滿十五六斤曰此稍可耳然不能制其死命須弟子一人同行乃可以槍授弟子已持鐵鈚先之未至十步外虎怒騰起數丈直取定因者三皆避之急以鈚擊虎首虎哮吼鈚折急呼弟子以槍刺之自喉達尻虎立斃官重賞之不受而去時臺灣方竊據漳泉間拳勇少年多往從之往往得官定因不屑也或厚遺之亦隨手散去卒以老壽

終

以兵部督捕右理事官顧藻為內閣學士兼禮部侍郎

內閣學士王  
尹方終養歸

有

旨停止今年秋決其可矜者仍分別減等以聞

十月初一日

頒康熙三十三年時憲書於午門是日琉球貢使行禮  
琉球國中山王尚貞謹奉表上言伏以布教溢中華設

席闌洙泗之祕觀光來異域執經分泮水之光棧橫篇  
中時展縑緗歌夜月杏花壇上長垂衣帶拂春風喜動  
儒林歡騰海國恭惟

皇帝陛下允文允武乃聖乃神

王澤廣敷措一代於利樂賢親之內文風遠播範四方  
於詩書禮樂之中臣貞觀海有懷望洋徒歎眷中山而

傾印綬蟻封久叨帶紉之榮入國學而奏典章虎觀不  
遺駑駘之選一之以聲音點畫口誦心維教之以節義

文章耳提面命況夫冬裘夏葛授衣盡內府之藏兼之  
朝饗夕餐賜食悉天厨之饌恩深似海難忘推解之隆  
澤沛如天莫報裁成之大雖三年國子敢云得九邱八  
索之微言而一介豎儒尤幸聞四書五經之大旨祇為  
養親念切

君門上重譯之章何意逮下

恩殊

天闕賜還鄉之



詔歸而言忠言孝咸知

君父之尊固當獻藻獻芹卿表臣子之敬伏願車書一  
統玉帛萬方有分土而無分民到處珠璣生腕下得大  
才乃得大用何人錦繡不胸中幸且耳目股肱不出圖  
書之府亦使東西南北無非翰墨之林矣臣貞無任瞻  
天仰

聖激切屏營之至

禮部為重修闕里

聖廟告成䟽請遣官告祭奉

旨遣脣社告祭皇第三子也

皇第四子皇第八子皆從以十一月初六日行禮

上之崇儒重道如此

十月十五日啓行禮都左侍郎  
席爾達兵部左侍郎朱都納從

十月初五日辰時補行

經筵於文華殿滿洲講官吏部尚書庫勒納兵部尚書  
索諾和刑部尚書圖納吏部右侍郎傳臘塔禮部左侍  
郎席爾達掌翰林院事學士燕禮部侍郎傳繼祖漢人

講官吏部尚書熊賜履禮部尚書張英

兵部尚書杜臻以病不與刑

部尚書翁叔元工部尚書李振裕吏部右侍郎兼翰林

院學士彭孫通戶部右侍郎王士禎

禮部右侍郎兼翰林院學士王封深

以病不與

侍尚書張英侍郎傅臘塔講中庸誠者自成也章

侍郎彭孫通學士傅繼祖講尚書益曰吁戒哉無虞至

四夷來王講畢

上還宮

賜宴太和門

九卿詹事科道會同秋審畢有人命三案擬議未愜予不敢默至九月二十八日刑部傳集天安門覆議彙題予乃侃侃言之滿太宰庫勒納公以下幸皆虛懷以聽三案悉得平反三案者其一於相元聊城縣人年七十五矣舊買薛慎言之田契價久明而慎言之孫小喜自鬻旗下逃歸挾索相元地價其祖呵之不聽相元不得已款以酒食予以錢帛不受而索金乃議往市易白金給之鄉保以其旗人也繩繫而行繫急脰絕遂死有司

當相元故殺子謂旗人索詐原有禁例況小喜之死死於繫非死於毆殺也且相元年七十五老矣於律例亦宜末減得改緩決其一王訓太平縣人太學生也其父者佐素封者佐父喪其行財人關中鍵獨不弔奠者佐以逋欠告之縣中鍵因妻激怒輒飲毒往王氏辱詈者佐不能堪毆之歸途毒發死有司索賄不得遂當訓故殺子謂此一事京輦士大夫皆言其寃且訓甘代父罪至擬大辟其父已死是一命已有一抵況向來秋審凡

以救父殺人者原情率從末減況訓實不殺人又身甘  
代父反不得原非向隅乎得改可矜其一房得亮齊河  
縣人有族人房懷德幼子阿羣者戲嘲其父名得亮怒  
掌擊之阿羣又詈適鑣刀在側得亮取而刺之中要害  
當以故殺子謂此鬪毆非故也得改緩決勞書升之通  
政梅桐厓銷大理皆極歎服謂公平反三獄吾儕今日  
集議不虛此行矣予每遇秋審

朝審必盡言以俟諸公決擇不敢緘口類如此耳

康熙三十年秋審有衡陽縣人蕭儒英者素挾左道惑衆會有鹽商王子明宿逆旅夜失三百金募能緝獲者重酬之江西士人曠齋與妻蕭氏僑寓於衡辱而貧儒英語商能入冥司知盜主名翌日又云已至冥司見青面鬼王示以盜即曠齋也遂率其黨東張飛等禽罷至誣拷之又禽蕭氏拷之以其少父復逼姦之巡撫止擬強姦律絞先是予在都院謂儒英罪狀不止是當改照左道律斬庶足蔽辜如撫擬秋審或邀矜緩則大姦漏

網羅夫婦寃弗伸矣司冠以畫難之予乃要以題秋審必不可從末減司冠然之是年奉

旨秋決停止三十一年秋審予向司冠及三法司諸公復理前語皆曰公言是遂寘儒英於法又楊成者京師細民也貸旗人某甲錢會新年成往省父母妻某氏獨處室中甲適索逋至窺成未歸乃遷延至暮入室挾姦明日成歸妻泣訴之成往甲所詰責甲傲然不屑反毆擊成成走甲持挺逐之成急顧市肆有小刀取擲之中



甲要害而斃法司當成故殺斬子力持言凡故殺則有必死其人之心有必死之之心則必挾挺刃以往今成徒手往而反為甲毆逐急而倉皇取他人之刃以禦之是誤殺非故殺也二律懸殊況甲強姦其婦罪固應死乎遂改擬可矜奉

旨末減亦予在都院時所爭之獄至三十一年

朝審得改正者與蕭儒英之獄一出一入皆不敢從衆也

十月初十日內閣奉

上諭朕聞山東省今年九月間曾有蝗起其遺種必已在地今年雨水較多若來春稍旱則蝗蟲復生不可不預為之計宜及早將田土悉行耨耕俾蝗蟲為覆土所壓爛則勢不復孳縱稍有遺種明歲復生地方官即各行設法驅捕不致繁多大有裨益著交與戶部作速移行直隸山東山西河南巡撫通行曉諭所屬地方將田土於今冬來春務急耨耕以弭蝗患如有不能遍耕之

田蝗蟲復生亦必速行驅捕勿至為災

十月十二日奉

上諭諭戶部陝西西安鳳翔二府地方連被災傷朕多方賑救轉粟蠲租又招集流移散給牛種然後四方化離之民漸次復還鄉井今歲雨澤霑足百穀阜成而人民甫脫饑寒未饒生計若明歲應徵錢糧即令輸納誠恐閭閻儲蓄終難充裕西鳳二府屬被災州縣衛所康熙三十三年糧米照舊徵收外其地丁銀兩著通與蠲

免爾部即行文該督撫嚴飭各屬遍加曉諭務俾均沾  
實惠以稱朕愛養休息至意

十一月初二日

駕謁

孝陵

二十一日

駕入部院諸臣集朝房午後傳戶部堂官至

乾清宮西暖閣

諭免順永保河四府錢糧

上諭諭戶部朕謁

孝陵沿途體察民生今歲雨水頗多田禾失收米價亦貴來春至夏米價愈貴民食必致艱難不得不預為籌畫朕意將通倉米每月發出萬石較時價稍減糶賣止許賣與窮民不得賣與多收販賣商賈似有益於民生爾部即會同倉場侍郎議奏部議遵行於今年十二月起至來年麥收米價平賤之時停止

輪菴和尚名同揆明相國文文肅弟震亨之子少為諸生名果字園公出世後常往雲南大理府著洱海叢談云大理一名羊苴咩城狄青討儂智高宋史稱智高棄金龍衣而遁不知所終殊不知其終於大理也今其宅遺冢尚存又云感通寺在府南十里點蒼山麓摩騰竺法蘭達楊升菴先生寓止寺前之小閣題曰寫韻樓四壁皆公墨妙啓牕則雞足雪山橫亘雲表明末滇詩人唐泰大來雜染號擔當和尚亦寓此樓壽九十餘而化

又云三塔寺內有黃華老人草書石刻字大如椀相傳以檳榔殼蘸墨汁書之老人宋元間人自江右來此久之仙去其詩即挂鏡臺西挂玉龍半山飛雪舞天風寒雲直上三千尺人道高歡避暑宮云云士禎按黃華老人即金翰林修撰王庭筠字子端此四詩有真蹟石刻在汾州府學朱翰林彞尊吳徵士雲皆曾見之蓋李中溪元陽侍御摹刻於黠蒼而滇人傅會為仙耳又云蒼山中巖亦號雪山相傳即如來苦行之地草石皆作梅檀

香旁有鳳眼洞有天生木橋其木半月一換四季長新  
久永昌鶴麗皆有此異又云洱海每八月望夜海中出  
珊瑚樹高數丈冬月大風海水倒卓起火光如山又云  
籬落間生圓果如龍眼紅黃色土人謂之橄欖入口咀  
嚼真橄欖也又云三塔寺有三塔隔洱海百里即望見  
之中塔正方高四十八丈十六級絕頂四角範四金鷲  
各高二丈塔下人以巨石投地金鷲輒昂首而鳴音響  
清越又云大理為龍窟逆藩吳世璠將滅時太和城上



晴天正午一白龍長數十丈飛舞雲際萬目共覩良久  
歸蒼山是歲大兵入境不血刃而定

十一月二十五日奉

上諭朕念切民生時屢宵旰或在宮禁之中或經巡省  
之地務以編氓疾苦備悉諮詢其從各省來京陞見官  
員及往來奉使人等亦無不以該省雨澤曾否應時田  
畝有無收穫并閭閻資生情形一一體訪比年以來因  
國家經費尚充遂將各省地丁額賦及舊欠錢糧節次

蠲免即從前未經停徵之漕糧亦逐年免徵總欲使海隅蒼生培固元氣以臻於家給人足之風今歲畿輔地方雖禾稼未獲稔收初意小民餬口之需猶足資給未必生計遂臻艱難頃者展謁

山陵沿途察訪民隱見今歲雨水過溢田畝被淹沒者甚多穀耗不登米價翔貴又聞順天河間保定永平四府所屬皆然目前米價既貴將來春夏之際時值益昂小民必艱粒食此朕目所覩覩若來歲錢糧仍然徵收

朕心實有未忍順天河間保定永平四府康熙三十三年應徵地丁銀米著通行蠲免所有歷年舊欠悉與豁免行文該府曉諭各屬務令人沾實惠以副朕子育黎元至意

李皓白道士也順治中居南嶽之九仙觀一日與巴陵舉人李槃立觀前忽見水簾洞口有殿閣廊廡三四重前後皆松杉歷歷可數久之乃不見即朱陵宮故址也王肯堂太史筆塵云關內劉貽哲謫海南市舶提舉云

見一犀杯注酒晝則日夜則月見於酒中酒盡則隱又  
見一珠自然作師子形纖悉畢具

衍聖公孔毓圻

奏為恭謝

天恩事康熙三十二年十月蒙

皇上以闕里

聖廟新成

特遣皇子告祭於十一月初六日致祭禮成謹望

闕叩頭謝

恩訖

臣

欽惟我

皇上日御講筵契詩書易禮春秋之奧躬親庶政接堯舜禹湯文武之傳乃

聖心益隆俎豆而寵光遂賁几筵

特遣皇子告祭皇子肅膺祀事裸獻加虔升降從容欣覩素嫺之大禮始終恭恪共欽精白之淵衷維時風清雲朗日麗星輝凡夫幽明交感莫非誠敬所孚

臣

遭逢

盛世感戴

天恩為此具本跪捧觀齎詣

闕旅謝謹具奏聞

十一月二十五日冬至

上親祭南郊次日

御太和門行慶賀禮

康熙三十三年歲需兵餉戶部派撥各直省總數直

隸歲需銀八十九萬七千九百一十四兩三錢一分零

河南銀二十萬六千七十五兩七錢一分零山東銀三十萬二千九十二兩七分零山西銀五十六萬八千四百八十四兩三錢二分七釐零陝西銀糧一百四十二萬八十一兩七錢一分八釐零甘肅銀糧一百五十一萬二千三百一十七兩五錢八分九釐零安徽銀五十七萬五千四百二十二兩九錢零江蘇銀八十萬五千一百一十九兩四錢九分零江西銀二十七萬八千四百一十二兩六錢二分零浙江銀一百九萬六千四

百九十兩二錢七分零湖北銀六十三萬九千八百六  
兩八錢九分零湖南銀三十七萬七千六十五兩一錢  
三分零福建銀一百五十萬一千一百九十七兩九錢  
一分零廣東銀一百五十萬九千八十三兩八錢一分  
零廣西銀三十七萬五千九十二兩九錢八分零四川  
銀七十五萬二千七百五十六兩九錢三分零雲南銀  
八十七萬四千二百一十二兩五錢五分零貴州銀四  
十萬六千一百六十四兩三分零 已上共歲需銀糧



一千四百一十七萬七千七百九十兩二錢一分零

三十三年兵餉各直隸協解總數 山西協解直隸銀

二十萬兩山東協解陝西銀八十萬兩河南協解陝西

銀二十五萬兩河南協解甘肅銀四十五萬兩河東運

司協解甘肅銀一十萬兩兩淮運司協解安徽銀一十

萬兩兩浙運司協解安徽銀一十萬兩兩淮運司協解

湖南銀三十萬兩河南協解四川銀一十萬兩山西協

解四川銀二十八萬兩陝西協解四川捐納銀二十萬

兩又河南協解四川銀一十五萬兩

預備三十四年春季兵餉

安徽

協解雲南銀二十萬兩湖廣協解雲南銀四十萬兩江

西解雲南銀二十萬兩

預備三十四年春季兵餉

江西協解貴州銀

銀三十萬兩安徽協解貴州銀一十萬兩

預備三十四年春季兵餉

已上共協解銀四百二十三萬兩

三十三年除派撥兵餉外各直省存剩銀數 直隸存

剩銀八十九萬六千七百二十兩零河南存剩銀一百

六十萬二千九百七十兩零山東存剩銀二百五十九

萬九千七百兩零山西存剩銀三百四十七萬八千八百五十兩零陝西存剩銀糧二百六十七萬一千一百八十兩零甘肅存剩銀糧七十七萬九百五十兩零安徽存剩銀七十八萬三千七百二十八兩零江寧存剩銀二百一十五萬二千八百兩零江西存剩銀一百八十二萬五千八百四十兩零浙江存剩銀一百四十五萬四千四百一十兩零湖北存剩銀一百一萬六千六百九十兩零湖南存剩銀七十一萬三千三百兩零福

建存剩銀五十一萬九千兩零廣東存剩銀七十六萬  
七千七百一十兩零廣西存剩銀四十萬三千二百五  
十五兩零四川存剩銀一十一萬八千三百五十兩零  
雲南存剩銀六十九萬一千二百二十兩零貴州存剩  
銀六萬二千七百二十三兩零關稅存剩銀六十萬七  
千一百五十三兩六錢零長蘆運司存剩銀五十四萬  
四千二百七十五兩零河東運司存剩銀四萬四千三  
百三十一兩零兩淮運司存剩銀一百五十六萬八千

四百三十四兩零兩浙運司存剩銀五十三萬六千七百五十萬零 已上共存剩銀二千五百八十三萬三百二十九兩零

居易錄卷二十二

欽定四庫全書

居易錄卷二十三

刑部尚書王士禎撰

天台山慧明寺有陳智者大師手書方等陀羅尼經四卷前三卷久亡宋僧元通做大師書補完之別書後一卷以備亡失明嘉靖中有譚守取去大師手書一卷今存者皆元通書吳江潘檢討次耕未遊天台見之云第四卷筆法精勁神采奕奕知譚所取乃元通書耳大師手蹟故在也

潘次耕云從天封上華頂惟善興寺有衆三十號叢林  
然亦編茅代瓦其餘小小茅蓬散處巖谷中單棲偶隱  
一瓢一衲齋鉢不繼而巖阿澗曲間值團瓢獨木為橋  
老樹縛屋落花不掃經聲琅琅為聖為凡不得而知也  
予謂風穴沿禪師單丁七年日乞村落夜然松脂倚遇  
禪師住法昌無僧徒開鑪日撾鼓上堂為泥塑十八羅  
漢說法有偈云法昌今日開鑪行脚僧無一箇只有十  
八高賢緘口圍鑪打坐諸方傳之固知真善知識未必



開堂領衆千百為羣如吳越間習氣也

近歲吳中洞庭山民金姓者入林屋洞深處見清水一泓中有玉大士像及銅龍數枚攜歸既而大病人有分取銅龍者無不病亟送還故處乃已

寒山子有二皆載天台山志其一即寒山拾得文殊化身其一道士李褐遇貧士去數日復乘白馬來謂褐曰頗知寒山子乎即吾是也見續仙傳

停止湖灘河所運米允山西巡撫噶爾圖之請也

王少宗伯慎菴

封

說黃州大聖寺崇禎中忽有鬼物為

祟住持僧晨盥輒擊其首甚患之會歲除乃炷香佛座之前熾炭於鑪而借寓鄰寺避之元旦忽覩寺中火光市人驚入視之乃一獨脚鬼醉臥佛殿上鼾睡未醒僧急取鐵索穿其臂衆繫諸殿柱鬼醒叫呶怒詈以其一足禦人終不能脫日將晡一童子於佛殿後觀世音像掌中見一紅果色如珊瑚圓如龍目異之取示衆人方傳玩鬼忽奮臂攫去吞口中即遁去不見唯遺鐵索在

或曰此所謂夔蜩蛎也

以前巡撫貴州僉都御史田雯為刑部右侍郎

刑部右侍郎李

迥給  
假歸

甲戌元旦

上御太和門受

朝賀禮

上諭直省學院須得人

命九卿會舉如陸龍其邵嗣堯其人者時龍其已歿尋

有

特旨以兵部右侍郎李光地提督順天等處學政直隸  
守道叅議邵嗣堯提督江南學政以翰林院檢討顏光  
敷提督浙江學政

女郎徐元象字奇孺黃州廣濟人舉人張楚偉字小損  
配詩文有雋才其京口寄父書云兒自襁褓未離掌膝  
江頭道別意緒淒然舟行風水便利遂達京口江南佳  
麗過眼成陳廣谷大川靡能記憶舅氏出鮑明遠大雷

岸與妹書與兒讀之如賦如頌蓬窓瑣瑣恨不能竟所  
思官舍清華几案如滌挑燈夜坐日起奉甘旨晨昏戀  
切切耳阿爺阿母無恙四時之序成功者退山林觴詠  
幽情暢遂何必紆拖青紫乃稱貴乎又送外絕句云送  
君入楚江悠悠歸路長一去隔千里魂夢伴瀟湘

無錫張秋紹

夏

老儒也以理學名東南與予未相識特

寫浦舍人長源東海生集四卷相寄并示所著孝經問

業子深愧其意會同年秦諭德留仙

松齡

書來亦許鈔宋

王質詩總聞及王舍人孟端集相寄十峰山人錢礎日

肅潤選予詩六卷亦至皆梁谿人也

戶部疏覆直隸巡撫郭世隆為謹陳被災等事奉

旨依議速行州縣積貯米穀減價發糶於民生大有裨益霸州等被災地方所有積穀除散賑外餘著減價發糶其沿河一帶景州等各州縣衛著將山東漕米每處截留二千石亦發糶以平米價爾部行文該撫責成州縣官實心奉行務俾小民均沾實惠朕不時遣人稽察

如民間不沾實惠將該管官一併從重治罪自去冬至  
今凡奉

旨兩糶官米減值以平市價矣

聖謨洋洋可為萬古救荒良法彼遇糶者真盛世之罪  
人也

二月初三日巳時舉

經筵於

文華殿滿洲講官吏部尚書庫勒納兵部尚書索諾和

刑部尚書圖納吏部右侍郎傅臘塔禮部左侍郎席爾  
達右侍郎多奇漢人講官吏部尚書熊賜履禮部尚書  
張英兵部尚書杜臻刑部尚書翁叔元工部尚書李振  
裕吏部右侍郎彭孫適戶部右侍郎王士禎禮部右侍  
郎王封濛侍尚書庫勒納賜履講孟子言近而指遠者  
善言也二節尚書英侍郎傅臘塔講易經繫辭易之為  
書也廣大悉備五句講畢

賜宴太和門



命吏部尚書熊賜履兵部尚書杜臻兵部左侍郎王維珍工部右侍郎徐潮為會試主考

二月初九日

命戶部右侍郎王士禎署兵部事

凡

經筵

駕將出滿洲禮部尚書侍郎二人候於

乾清門導

駕前行至

文華殿門然後就班講畢

駕還宮仍前導至

文華門而止滿漢掌院學士赴

乾清門恭繳講章故學士往往不獲與宴

田漪亭少司寇雯說貴陽府城西有泉應十二時消長

泉上刻石記時刻候之百不爽一漪亭名之曰信泉

楊君謙廬陽客記云東坡子孫在六安不知何據戶部

主事趙瑄邳縣人來謁予問二蘇公墓云尚有後裔為奉祀生員守家云客記又言伊川子孫在英山

命內閣大學士阿蘭泰戶部尚書馬齊兵部尚書索諾和同法司清理刑部獄囚減釋者一百有八人兵部督捕順天府等衙門人犯一併減釋有差

前詹事府少詹事兼翰林院侍講學士以副使原品休致耿介卒介字逸菴河南登封人順治壬辰進士與睢州湯尚書斌上蔡張知縣沐齊名稱中州三大儒云

門人莆田林石來

麟煇

以禮部儀制司郎中出督貴州學

政云去年在閩得王文成公龍岡漫興詩墨跡一卷蓋

公謫龍場驛時所書屬予跋其首章云投荒萬里入炎

州却喜官閒得自由心在夷居何有陋身雖吏隱未忘

憂春山卉服時相問雪寨籃輿每獨遊擬把犁鉏從許

子漫將弦誦比言游若為之兆者按文成以疏救戴銑

等忤逆瑾貶黔之龍場驛作何陋軒居之日夜默坐頓

悟致知格物之旨席文襄書為提學闢貴陽書院親率

諸生北而事之蓋公平生之學得力於龍場時居多觀  
卷中五章可想見其無入不自得之樂石來閩之名士  
私淑文成有年故以倡明絕學勗之文成書道勁似山  
谷

姑孰曹祿字滄波明光祿卿履吉子年七十矣示所著  
瀟灑堂集文頗有奇氣其霍光論以莽操例之最有見  
二月二十八日揭曉會元裴之仙江南丹徒人

尤翰檢悔菴

侗

寄都元敬南濠文略寫本凡六卷其後

二卷即金薤琳琅諸碑跋也又楊君謙雜著寫本若干  
卷文曰燈牕末藝曰攢眉集詩曰齋中拙詠曰都下贈  
僧詩曰菊花百詠別有所謂金山雜志

山在吳縣  
西三十里

廬陽客記者客記最簡古有史裁其自序云廬守馬汝  
礪以舊約來迓遂赴之由夏涉秋始歸於廬之風土頗  
能記憶暇日因載之筆札命曰廬陽客記馬君名金蜀  
西充人予同年進士博敏好文禮予良厚惟著書則鮮  
合云按馬嘗刻汪藻浮溪文粹於廬者亦文雅非俗吏

予曾記其前生事於皇華紀聞君諱又嘗修吾鄉章邱縣誌稱善本云南濠題跋極稱安福顏德侔陝州誌得古人敘事之法登封令李君新誌去取其嚴敘事有法二誌予所未睹併記之以待訪

三月戶部尚書王隲原品休致內閣學士兼禮部侍郎李應鷹都察院左都御史董訥罷

辛未科庶吉士散館

御試於

暢春苑授史職者二十人

內張豫章戊辰一甲第三人留  
寶克勤徐日暉戊辰庶吉士

館教習者二人

一甲第三黃叔琳庶吉士狄億以知縣外用者八人  
惠周惕張

孝時陳汝咸毛鵠金潮張翔鳳  
胡麟徵陳綽綽戊辰庶吉士

革職者一人

張禹玉士  
戊庶吉士

翰林院滿洲掌院學士傅繼祖罷以戶部倉場侍郎常

書兼掌院事

上諭諭戶部山西平陽府澤州沁州所屬地方前因蝗

旱災傷民生困苦已經蠲免額賦並加賑濟而被荒失

業之衆猶未盡覩幹寧其康熙三十年三十一年未完



地丁錢糧及借賑銀米若仍令帶徵刻期完納誠恐閭閻力絀益致艱難著將所逋欠錢糧五十八萬一千六百餘兩米豆二萬八千五百八十餘石通行蠲豁用紓民力爾部行文該撫嚴飭該府州縣官悉心奉行務俾人沾實惠倘有已完在官捏稱民欠及已奉蠲免仍復重徵官吏作奸侵漁中飽一有發覺定以軍法從事遇赦不宥爾部即遵諭行特諭

三月二十三日

上御太和門傳臚第一甲及第三人狀元胡任輿江南  
上元人榜眼顧圖河江南江都人探花顧悅履浙江海

寧人二甲傳臚汪倓江南長洲人

汪辛未中式

總督雲貴兵部右侍郎范承勲擢都察院左都御史原  
任內閣學士田喜霽補內閣學士兼禮部侍郎

四月十三日

御保和殿親選庶吉士汪倓等三十九人

滿洲七人俱改庶吉士辛未補

殿試入選者四人汪倓長洲人王楨  
華亭人陳成永海寧人五哥滿洲人

是科經房得人最盛者翰林院檢討彭直上

始鼎甲二

人胡任輿顧悅履庶吉士四人黃龍眉黃中理周起渭

殷元福也直上鄧州人故布政使禹峰

而述

子諸生時執

經於子任輿以辛未受知於子侂得而復失之後知為

任輿名解元也悅歎彌日今乃受知直上信遇合有時

文章有神也聞任輿少時嘗夢登高山手摘香櫞二枚

自吟詩云手弄雙元小天下至是果驗

胡辛酉江南解元

慎菴少宗伯

封

潞言明末楚中某公官雲南過一山險絕

處輿夫失足其愛女墮山澗中謂必無生理號泣而去  
任滿遷官去滇再經其地設祭招魂而哭女忽自空中  
飛至家人皆驚以為鬼也詢之曰女人也非鬼也當墮  
澗時自意必死比及山半冒於樹得不墮久之饑甚然  
不得下乃解帶繫樹徐緣而下其下乃無水聞澗草甚  
香試采食之遂不饑四望皆絕壁不通人久而安焉茹  
草既久遍體生毛遂能輕舉意之所至翩然赴之捷如  
飛隼適遊行澗中聞父母呼女名字故來耳父母欲攜

之歸不可曰此中甚樂不思家也復飛而去

大鐵椎者不知何許人亦無姓名嘗為懷慶清華鎮宋氏客宗善技擊遠近多就學號宋將軍客貌寢右脇挾大鐵椎重五十斤飲食不暫離其椎鐵柄摺疊環複如鎖上鍊引之長丈許有陳燦者嘗過宋與客同宿夜半客曰我去矣言訖忽不見視牕戶皆扃如故昧爽醒客已在榻鼾睡矣一日辭宋去曰吾數殺賊奪其金皆仇我久居此禍且及君今夜半約決關某所當往赴之

宋欲往助客曰不可賊且衆吾欲護君則不能快吾意奈何宋強與偕將至謂宋曰君但登堡望之慎不可近時星光照曠野百步見人客馳下吹觱篥數聲頃之賊四面集約二十餘騎操弓矢步從者百餘人客大呼揮其椎左右擊殺馬步三十許人餘皆潰竄又大呼曰吾去矣遂向東馳去疾如鳥隼莫知所之寧都魏禧為之傳

人知李北海文學本於父善不知善文選學本於其師

曹憲也憲江都人隋祕書學士常注廣雅以昭明文選授同郡魏模公孫羅江夏李善於是其學大興見唐書儒學列傳

嘉靖二年蘇州太湖中龍與蚌鬪龍自雲中直下其爪可數十丈蚌於水面旋轉如風仰噴其涎亦數十丈三四日乃已後漁人得死蚌殼可貯粟四五石

上諭禮部取霸州廩膳生員林佳廕充內官學漢文教習

旨曰教朕書林師之孫其家甚貧云云故舊不遺如此  
真

帝王之盛節也恭誌之

慎菴少宗伯言河南某府縣有人

忘其姓

因避黃巢之亂

入山久之無所得食日采松柏葉食之遂絕煙火兀坐  
巖洞中始則有虎豹虺蛇千百遶之不為動繼又有夜  
叉鬼魅之屬變態百出終不為動又久之乃無所見時  
時出游人間其二十餘代孫皆及見之留止輒數日為



之抱子至蟄蟲坏戶輒坎土穴蟄其中雷發聲始起  
康熙十年其縣令有子病羸醫皆謝去胥史或言某仙  
人能療此疾若因其裔孫以禮虔請宜可致令如其言  
果至令夫婦焚香跪拜呼以仙人搖手避謝不敢當令  
其子出望見之曰無害也命作土室僅容兩人為穴通  
飲食扃其戶戒家人不得潛窺五日後聞擊戶聲乃啓  
其扃子出已豐腴如平時病霍然矣父母問之云初入  
兩人皆坐以背相抵其背熱如火不可當戒勿移動既

又抵足臥足之熱又甚於背遂覺精神頓王肌肉復生  
不知沈疴之去體也令謝之金不受送之布取其四遂  
辭去途遇丐者輒予之叱出郭布已散盡令使人隨之  
其行如風奔馬不能及歸報令歎息而已又云其狀貌似  
五十許人也

沔陽州王翁者夫婦皆奉佛里稱善士年五十無子始  
舉一女甚明慧授以書輒能強記翁媪晨夕禮佛女輒  
膜拜於後年十五一夕就寢夢寐中若有衆捧持之以

手撫摩者晨起如廁則變為男子矣康熙己巳春鄖陽  
軍帥致之留月餘乃去予門人衛台瑞凡夫曲沃文清  
公子也時知府事親見之其客慈谿馮之俊至京師述  
之如此

曲沃賈中丞漢復巡撫陝西日有民婦孕二十月不產  
一日忽從左脅迸出婦昏仆而死其子至今尚存

西安又一民婦孕將娩暴卒殮且葬矣一日其夫過市  
見一婦人攜竹筐前走衣飾舉止悉如其妻心動尾其

後遶出城郭婦人直趨墓所忽不見即妻葬處也告於  
官啓而視之發土及榔輒聞兒啼棺已開矣兒坐榔中  
旁有竹筐貯餽飫如初飼兒口中者捫其妻則無生氣  
乃闔棺仍瘞之取子以歸與生人產者無異二事亦凡  
夫說馮述之云

命戶部總督倉場侍郎兼翰林院掌院學士常書禮部  
尚書兼翰林院掌院學士張英教習庶吉士又

命侍讀張榕端等八人教滿洲漢軍庶吉士詩賦古文

說文云人蓂字與參同扁鵲云有毒或生邯鄲三月生  
葉小花核黑莖有毛九月採根有頭足手面目如人春  
秋運斗樞云搖光星散為人參廢江淮山瀆之利則搖  
光不明人參不生廣雅云參地精人參也梁書阮孝緒  
母疾須人蓂舊傳鍾山所出有鹿引之鹿滅得此草異  
苑與廣五行記云土下有呼聲掘之得人參如人形四  
體備具聲遂絕右宋人姚寬西溪叢語所載今遼參所  
產在烏喇黑龍江等處每歲除

上供外惟親王郡王世子貝勒貝子公鎮國奉國將軍  
得遣人往採人各有定數康熙三十三年以來帶私參  
入關數多下九卿議減去王等以下采參人數人參亦  
有定額山海關設權稅部員法嚴重矣

田疇傳字子泰或云子春陶詩聞有田子春節義為士  
雄姚寬引漢書劉澤傳云高后時齊人田生遊乏資以  
書干澤澤大悅之用金二百斤為田生壽田生如長安  
幸謁者張卿諷高后立澤為瑯琊王晉灼曰楚漢春秋

云田生字子春按此詩上文云策馬至無終無終正疇  
所居若澤傳田生乃齊人其說謁者張卿乃遊士說客  
之流安得稱節義此寬好奇之過也又杜詩少年行黃  
衫年少來宜數寬引霍小玉傳有一豪士衣輕黃衫挾  
朱筋彈云云更為無稽而箋注杜詩者取之按寬字  
令威嘗測金海陵之敗所著書二百卷古今同異無不  
該括晚始召對殿中忽感風眩而卒見葉正則集

顏文忠公書干祿字書碑在蜀潼川州唐梓州也建昌

道僉事宗人省齋

曰曾

摹搨相寄字尚完好首云朝議大

夫滁沂濠三州刺史上柱國贈祕書監顏元孫撰第十

三姪男金紫光祿大夫行湖州刺史上柱國魯郡開國

公真卿書舊志稱公從兄杲卿為梓州司法參軍公往

省之因書按集古錄公在湖州所書惟干祿字書放生

池碑也又按集古錄云干祿字樣顏真卿書楊漢公摹

真卿書乃大厯九年刻石開成中已訛缺又云干祿字

樣別有模本文注完全可備檢此刻殘缺處多直以魯



公所書真本而錄之爾此完好者當是漢公模本耶

宋牧仲中丞自吳中鈔寄洪炎玉父西渡集僅一卷考  
焦氏經籍志玉父西渡集一卷與此本合然編首題卷  
第一又似不全之書何也坐上呈師川有懷駒父七律  
所云欣逢白鶴歸華表更想黃能出羽淵正在集中其  
詩局促去豫章殊遠又經籍志載洪芻駒父老圃集洪  
朋龜父清非集皆止一卷此本牧仲鈔之醫士陸其清  
家

總督湖廣兵部右侍郎丁思孔調補雲貴總督以在籍  
丁憂原任巡撫湖廣兵部右侍郎吳璵為湖廣總督仍  
令服闋赴任先是戶部尚書缺吏部列名上  
特諭俟丁憂原任刑部尚書陳廷敬服闋啓  
奏皆異數也

五月初八日

特諭翰詹衙門自少詹至史官日輪四員內直南書房  
初九日試夏日內庭應

制七言律 初十日試賦得西園翰墨林應

制五言排律

賜侍讀學士徐嘉炎

御筆陶詩臨蘇軾書

閒居三十載一首末云元豐四年三月望後二日書於綠雪齋中

山蘇軾 十一日試賦得膏雨潤公田應

制五言律

賜右庶子孫岳頌

御筆臨米芾書一卷又

賜庶子陳論等三人

御書石刻千文十二日試賦得紫禁朱櫻出上蘭應

制限韻五微

七言律

賜侍讀陸肯堂等二人

御書石刻千文十三日試詠五臺金蓮花詩限韻八齊

五言律

御製一首又

命掌院尚書張英太常少卿勵杜訥同賦十四日試賦

得崇文聊駐輦應

制限輦字

五言古

十五日試賦得衣露淨琴張限韻五微

五言律

是日編修仇兆鼇進所注道德經十六日試恭讀

御製覽貞觀政要詩應

制限韻二蕭

五言律

十七日試恭讀

御製時巡近郊憫農事有作應

制限韻八齊

五言律

十八日試恭讀

御製懋勤殿讀尚書至無逸篇有作應

制限韻五微

五言律

賜編修張希良

御書白羽扇賦十九日雨試恭讀

御製觀天儀器詩應

制限韻九佳

五言律

是日入直者八人

賜編修宗大業

御書李白詩

渭北春天樹四句

二十日

駕幸通州二十五日

駕入二十六日試

聖駕夏日閱視河隄詩應

制限韻六魚

五言律

是日入直者九人二十七日試恭讀

御製宮門聽政示閣部諸臣詩應

制限韻六麻

五言律

二十八日試恭讀

御製詠史詩應

制限韻十灰

七言律

二十九日

上躬祀北郊還宮試渾天儀詩應

制限韻十蒸

七言律

閏五月初一日試賦得虛心高節雪

霜中應

制限韻十二文

七言律

初二日試讀朱文公文集應

制限韻十四寒

五言律

初三日試賦得駐輦華林側應

制限韻十三覃

五言律

五月十二日

特諭釋原任貴州巡撫右副都御史衛既齊原任翰林

院編修楊瑄放歸本籍

衛猗氏人甲辰進士時流黑龍江楊華亭人丙辰進士時安置



奉天

特召二甲進士陳夢球試誠者聖人之本論一篇以為

庶吉士同胡任與等教習讀書

夢球同安人籍旗下

是科甲戌選

庶吉士凡四十人前此未有也

順治己亥重行會試自鼎甲三人外選庶吉士四十人

復增興化周漁凡四十一人

本朝館選惟此兩科最多

以原任吏部右侍郎張集為兵部右侍郎

以詹事府少詹事兼翰林院侍講學士朱阜提督順天等處學政

馮具區集載元張伯雨墓在南高峯左麓明正德間有山民鉏地數尺見墓中一人盤膝坐爪髮俱長偶傷其腦漿忽迸出良久復合懼而掩之墓中有書二冊攜其一出至鄭栗菴環家鄭願以一金易之其人云當至墓所再取其一途中忽風雷大作失書所在

又云虞長孺祖母年八十餘露坐庭中見有三人挨月而過急呼其姒同觀姒出遲僅見其二須臾俱入月中矣此與予池北偶談所載文登畢生二事相類

五月十六日以翰林院侍讀張榕端為國子監祭酒

祭酒

吳苑予  
假歸

龐工部塏霽公示甲戌歲新詩其病足一絕句尤可喜  
短歌微吟朝復昏吾患何有有身存即妨美人笑  
春來不過平原門龐前翰林檢討任邱人

大學士張玉書尚書李振裕學士顧藻被

旨各書冊子綾幅進呈隨

賜

御筆張得臨米芾大字一卷

五言律秋帆尋賀老載酒過江東末云元祐戊辰八

月八日襄陽米芾

李得臨董其昌天馬賦一卷顧得錄唐銅梁

千里曙雲開一首張李二卷首用康熙

御筆之寶顧幀末用乾卦圓印文曰體元主人又稽古

右文之章皆絹素也

馮具區集跋宋孫尚書覲仲益尺牘云聞之毘陵人尚書實大蘇公遺體孫老得公棄婢而生畏時禁不能自明而詳其顛末於家乘予按仲益非君子且爾時梁師成亦自詭坡公遺體公安得有如許既娠之婢而嫁之又安得皆僉人夤緣附託適足以辱公耳又按國史經籍志覲鴻慶集四十二卷予家有其曲簡尺牘舊刻本若干卷

鄧范氏藏書甲於東浙康熙辛未壬申間予在戶部范

會元光陽國雯為屬從借天一閣書目所藏經解唐人

集亦不甚多聊錄於右以備咨訪

宋元人集  
不及載

詩輯

毛詩名物解

梁寅詩衍義

詩童子問

詩

補傳

毛詩本義

魯詩世學

詩疑問

詩斷法

倪畏菴詩傳纂義

呂氏讀詩記

詩解頤

右凡十二部

唐太宗集

杜工部詩史舊集

韋江州集

又蘇州集

溫

庭筠集

張曲江集

李翰林集

盧仝集

杜牧樊

川集 張燕公集 岑嘉州文集 劉賓客集外集

李頎集 李衛公集 顏魯公集 李賀集 孟東野

集 郎士元集 杜審言集 王右丞集 唐僧宏秀

集 賈閬仙集 楊炯集 盧照鄰集 松陵集 錢

考功集 王勃集 駱賓王集 陳子昂集 沈佺期

集 孟浩然集 補遺 高常侍集 劉乂集 崔顥集

鄭谷雲臺編 蘇許公集 歐陽詹集 常建集 劉

隨州集 李洞才江集 沈下賢集 呂溫集 羅隱

集 陸龜蒙集 皮日休集 李元賓集 韋莊集

杜光庭廣成集 李紳追昔遊集 鮑溶集 韓昌黎

集 柳柳州集 李頻梨岳集 薛能集 王建宮詞

右凡五十五部詩集多而文集頗少即予所見如  
獨孤及權德輿李翱皇甫湜元結孫樵劉蛻司空  
圖之屬亦無之蓋非全目矣

歷城門人趙于京豐原官城武教諭寄其邑二碑尚極  
完好蓋世鮮知之摹搨者少故也一虞永興夫子廟堂



碑不減王彥超翻刻西安本元贈中憲大夫中書兵部  
侍郎上騎都尉清河郡伯張公墓碑銘翰林侍講學士  
中奉大夫知制誥同修國史元明善撰集賢學士資德  
大夫趙孟頫書資善大夫御史中丞王毅篆額張諱成  
濟寧之虞城人戶部侍郎孜之父元清河古文為當時  
之冠與吳興書法真兩絕也二碑近金薤琳琅金石志  
俱失載

辛稼軒帥長沙見舉子名趙鼎者怒擲卷於地曰忠簡

佐國元勲胡又一趙鼎耶近日後生小子命名不避前輩甚非古道即如海豐王少宰清與先兄西樵同年有兄弟之誼而其孫命名與先高王父太僕府君同三原王考功九鼎與予同朝亦通譜誼交甚稔而其諸孫皆竊予洎諸兄名豈得云不知耶近於戶部見一湖州援例監生名汪茗文亦殊可笑蘇湖鄰郡亦得云不知世有汪鈍翁耶筆之以為薄俗之戒

歙縣門人汪洪度于鼎寄書曰生少從諸遺老游竊聞

其緒論以為詩之以仙稱者古今得四人焉曰陳思曰青蓮曰眉山曰新城心識其語而未測其所以然稍長縱觀載籍由漢魏以迄於今大而塞乎無垠細而入乎無間集古今之大成夔萬象而獨出者莫先杜陵尊之曰聖誠莫與京矣而新城公實亞之矣乃未遽尊之為聖而僅推之為仙何與毋亦其氣超乎鴻濛之先味在於酸鹹之外往往使人一唱三歎恍游神於寥泝駕鸞鶴摘星斗蒼蒼然遠而無所至極矣而實不在格調音

響間也島嶼雲霞有目者莫不瞥然一見而實有不可  
即者然則其不遽尊為聖者智未足以知而其推之為  
仙者殆亦有如列子所云藐姑射之神人邯鄲生所歎  
以為天人者非先生不足以當之歟要非熟復五先生  
之書咀其菁華探其根柢猶未知諸遺老之言之不我  
欺也因思仙聖間代而生生又同時久擬裹糧三月北  
學遊燕執經問業計毛髓縱難洗伐而流風可起懦頑  
逡巡至今未果斯願已又思鄙人居處雖近黃山碧溪

而耳目終在塵土倘得飛仙吹噓所及不必入海求蓬萊仙仙乎亦足以遺世焉昨歲不揣卑賤屬敝郡吳司成代陳以黃山始信峰草堂杏花春雨樓圖卷奉乞鴻章洎司成書至謂先生一身繫天下之重政府精勤雖甚存注而筆墨未遑生聞之而躍躍然怦怦然惟懼其究未易得也敢因家弟孝廉澂公車之便再申前請伏冀先生吐握之餘錫以五字咳唾九天隨風珠玉引雞犬而納之雲中或亦度世真仙所慈憫而不終遐棄者

也璫瑁筆牀一具松明茶一斤附貢主臣

澄是科庶吉士其父文選

郎中鐔庚戌進士  
與先兄東亭同年



居易錄卷二十三

欽定四庫全書

子部

居易錄卷二十四至  
二十六

詳校官侍讀臣陳崇本

員外郎臣牛勣文覆勘

總校官中書臣朱 鈐

校對官中書臣方大川

謄錄舉人臣范光謙

欽定四庫全書

居易錄卷二十四

刑部尚書王士禎撰

海蠶大如蠶青黑色頂有一竅溫台人取置塘中插竹如林蠶食水草久之則緣竹而上自竅吐粉凝於竹末粉盡蠶入水死即海粉也

台州太平縣瀕海多蛟龍之孽康熙二十六年居人見有龍形者五偃臥山田中如寐者獨一斑龍數奮鬣欲動長老曰每五龍見必有大水其來久矣已而果然



從慈仁寺市得霍文敏韜文集韜本張孚敬桂萼方獻  
夫之黨以議大禮自兵部主事驟進詹事兼學士觀其  
奏議諸篇叫呶攻訐怙惡遂非其尤詭僻乖清議者如  
大禮考證疏以司馬文正公與王莽並論略云主哀帝  
議者王莽為首師丹甄邯劉歆皆莽鷹犬也主濮議者  
司馬光為首呂誨范純仁呂大防皆光羽翼也後議薛  
文清從祀又追論溫公不忠不孝不可祀孔廟辱聖門  
韜生數百年後尚欲噓章惇蔡京久燼之燄真無忌憚

之小人矣吏部侍郎謝恩疏則云欲與尚書汪鉉更革  
百年積弊期之一年可定治體期之三年可成治功期  
之三十年泰和元氣溢宇內矣何其大言不慙也且汪  
鉉何人也而韜與之協恭若此辭詹事疏則云三楊顯  
寵病國禁訛言疏則云前聖駕南巡文臣惟袁宗儒不  
受饋武臣惟郭勲不受饋蓋欲媚武定以甚貴溪之罪  
而不暇恤乎人言也從來仇正人亂國是未有如韜之  
甚者也獨其疏薦廢籍諸賢李夢陽康海王九思伍希

儒謝源顏木等并及大禮得罪諸臣豐熙楊慎鄒守益  
夏良勝等大獄得罪諸臣徐文華唐樞劉仕等此一事  
亦未可以人廢言耳

昔人喜李流芳長蘅詩穀城山曉青如黛滕縣花開白  
似銀予亦愛之康熙乙丑以祭告南海之役途出鄒滕  
憶前句賦一詩適門人戶部主事何炯貽予長蘅詩鈔  
本是詩在其中惜全篇不稱別有東阿道中一首云騰  
騰兀兀逐塵行忽似春山為解醒高下欲隨人境繞逶

迤偏覺馬蹄輕誰教柳色氤氲映不分梨花處處生愛  
煞穀城山下路風光況復是清明又滕縣道中云山欲  
開雲柳乍風杜梨花白小桃紅三年三月官橋路策蹇  
經過似夢中二首風調頗佳

五月二十九日

上親祀

地祇於北郊

蔡維寧吳洞庭山人弱冠能詩為工部尚書臨清柳公佐

所知會逆閹魏忠賢亂政柳公將上疏發其姦病不能起  
泣屬維寧維寧諾之奮筆草數千言疏成柳已病草其  
家人竊焚之維寧慟哭出都閹既誅維寧踊躍之清源  
拜告柳公墓卒年三十一蔡與金先生俊明相善柳公萬  
厯中為諸生與先祖及蒙陰公文介公鼎濟寧于念東中  
丞若同受知提學蹇理庵達先生後天啓中宵人造東  
林籍貫諸書又與先伯祖太師公同列黨籍其從孫燾  
字公隆能詩工書與予辛卯同年相善云

蔡事載  
具區志

洞庭山馬家墳古松一株大可合抱順治甲午造戰艦  
松在伐中馬氏子孫相率號泣塚上是夜鄰家聞哭聲  
嗚嗚不絕夜半忽有大聲如裂百丈縵帛者旦視之松  
自本至末已裂破枯死矣於是一境之樹皆得全人稱  
之曰烈松

緱長弓太湖中人通文史善鑄鐵冠如意常為楊廉夫  
鑄鐵笛楊贈詩云湖中冶師緱長弓有如漢代陶安公  
門人查吉士昇遺沈石田蘭坡圖上有徐武功題詩云

臯鶴無遺影坡蘭有古香只應圖畫裏便是白雲鄉沈  
氏凝香閣題黃鶴山人蘭坡圖後有武功及文華殿御  
考第一人小印下方有石田題云天全存稿蘭坡句直  
是蘭亭價可當唯我與卿皆得寶百年臭味莫相忘後  
跋云天全先生常題周曾大父蘭坡圖此其存稿也嗣  
勲親家索周作圖連裝成軸敬識此詩成化甲辰歲沈  
周拜題武功草書瘦掣如金錯刀法石田字畫俱草草  
然自是真物

田少司寇綸霞

雯

說昔官武昌監司遂安毛際可會侯

訪之一日遊書肆見一丐者衣服襤褸而神宇清異臂  
布囊中蓄鼠數十頭以為食毛予之錢不受指其囊曰  
只此足矣得錢無所用也因閱毛所買書曰此習見書  
豈不貯腹笥而更買諸肆乎毛益駭其言因延之坐與談  
九流三教無不淹貫又索紙自寫其詩盡數十番字雜  
行草篆隸詩多警策間有隱語後數年夏包子作亂武  
漢間以其語驗之皆合毛詢其居處姓名不答顧曰子



得遇我幸也我從此逝矣遂不復見

宋桑世昌蘭亭博議子庚午歲曾借之朱竹垞太史舊  
刻甚精妙惜匆匆還之未及鈔寫讀葉水心集云世昌  
事事精習詩尤工其即事云翠添鄰塹竹紅照屋山花  
蓋著色畫也

盤山拙菴師刻四十二章經寄示予讀之疑其俚淺與  
後來金剛華嚴二楞等絕不類葉水心亦云四十二章  
經質略淺俗是時天竺未測漢事採摘大意頗用華言

以復命非浮屠氏本書理當然也

葉水心有橘枝詞三首記永嘉風土其第一首云蜜滿房中金作皮人家短日挂疎籬判霜剪露裝船去不唱楊枝唱橘枝如柳枝之專詠柳也第二首三首則泛言風土如竹枝體近汪鈍翁亦嘗作橘枝詞蓋本此

海寧朱一是近修作嚴子陵論云客星凶象也其數有五曰周伯曰老子曰王蓬絮曰國星曰溫星周伯主喪者也老子主饑者也王蓬絮主兵者也國星主疾者也

溫星主暴骸者也皆天道之至不祥而謂子陵當之可乎又按建武三十一年十月有客星燄二尺許西南行在輿鬼東北六尺而滅凡見百十有二日後二年光武崩此豈亦因子陵致乎自後明帝順帝星三見章帝一見和帝五見靈帝再見史占或主兵或主喪劉聰時客星入紫微太史康相以為非常之變聰遂滅亡其他客星之見不勝紀總之驗無子陵之類後人信之謂子陵為客星云云其說新異而甚有理然是襲桑民懌客星

亭記耳其他史論數十篇亦多快論論李白云明皇以  
永王為江南節度穎王為劍南節度盛王為淮南節度  
支庶悉領大藩故姦人無割據之心安史既殲海內遂  
大定而無他變其議創於房琯時安祿山聞之大驚而  
賀蘭進明即以此譖琯肅宗罷琯機務出為節度當時  
肅宗之惡琯即忌諸王之本意也忌之而遂誣永王璘  
以反誣白以逆璘且不能自明何有於白哉嗚呼均為  
明皇之子均戮力於社稷李泌從肅宗則為戡亂之名

佐李白從永王則為黨逆之累臣忠智之士幸不幸殊  
焉論李衛公云牛李之黨蘇轍謂牛以德度勝李以才  
氣勝並有瑕瑜焉自吾觀之其相去遠甚僧孺者無識  
之庸流德裕者經世之名佐也僧孺之黨若李宗閔李  
逢吉之徒皆儉險嫉媚之小人大禍人國而德裕之黨  
若裴晉公則國之勲臣社稷視以安危者也又云使天  
祚唐室假武宗以年而德裕前不小用於節使後不摧  
折於貶竄并一生之精神才智盡效於政府之區畫將

藩鎮盡革外攘內安不難復貞觀開元之盛云云其論維州事尤確此論與予前說正合益知潁濱立言之謬論王安石云後世之變法者三人商鞅王莽與安石耳商鞅變之而國富彊莽安石變之而天下大亂王莽變法於初定之新故亂發十八年之速安石變法於久安之宋故亂成十數年之後云云以安石與莽並論甚確然非元祐諸賢則安石之釀亂亦不待宣靖之日使惇卞諸姦不以紹述之說進則北宋至今存可也予愛其

文而申其說於此論張浚云宋之不能復振由南渡也  
宋之南渡由李綱之去也綱之去由浚劾也汪黃苗劉  
諸姦未必能亡宋而浚實亡之非誤國之首罪哉云云  
此亦與予前說合詞義嚴正可敬也

近修跋魯公帖云杭州志載魯公為鹽官人予所居雙  
仁里即二顏故里因以得名又云海寧顏氏家藏鈔本  
云公祖昌任鹽官州判卒遺子必寧幼孤遂寓籍鹽官  
生公子按魯公自誤其父通議大夫行薛王友柱國贈

祕書少監國子祭酒太子少保顏君廟碑首曰君諱惟  
貞字叔堅又曰昭甫字周卿君之父也與內弟殷仲容  
齊名特為伯父師古所賞重又曰勤禮字敬君之祖也  
與兩兄弟師古相時同時為弘文崇賢學士又曰皇秦  
王記室思魯字孔歸君之曾祖也隋司經校書東宮學  
士奉迎義旗於長春宮拜儀同弟愍楚遊秦其父即北  
齊黃門侍郎之推也魯公世系章章如是祖昌鹽官州  
判卒官及父必寧少孤之說何其不經也近修以文章



自命乃信此俚鄙誕妄之語而漫不考据耶此與倪氏  
偽譜皆可一笑

大理寺卿陳汝器奏為臣父已沐殊榮謚典未邀異數  
乞沛恩綸以光泉壤事康熙十三年耿逆反叛臣父啓  
泰全家二十一口同時殉節荷

皇上從優贈卹榮及臣身向遵定例以臣父品級未及  
與謚之列故臣未敢泣請查武昌兵備道臣葉映榴殉  
節蒙

皇上破格予謚映榴既邀

格外之恩

臣

父當不知何如歆羨於九京也伏祈

皇上一視同仁破格予謚俾

臣

父泉壤重光存歿頂祝

皇恩於不朽矣奉

旨陳啓泰于闐逆變亂時忠貞不屈闔門殉難深可矜  
憫陳丹赤溫州殉難亦屬可憫俱應予謚以示褒旌著  
議奏

戶部主事趙瑄汝州郟縣人以兩蘇公祠墓諸碑刻見

貽率俗筆惟東坡先生次韻伯固遊蜀岡送叔師奉使  
嶺表五言詩所云新苗未沒鶴老葉初翳蟬者翻刻頗  
佳此石本在揚州禪智寺久斷闕仆草間順治辛丑予  
官廣陵求得之又次韻一篇康熙乙巳靈隱碩揆上人  
來居此寺因謀陷蘇公詩石於壁上人及予兄弟賦詩  
紀事諸名士和之有禪智倡和詩一卷此蓋摹揚州本  
也予司直天下金石志于揚汝二州皆不及載

貴陽有黑神廟祀唐南霽雲凡水旱癘疫兵革之事有

禱必應見田綸霞

雯

少司寇黔書及郭青螺集又霽雲

乞師時同行將王扞者亦斷一指後同死睢陽史失之  
黔陽赤寶山立祠號昭烈王見朱近修孝廉集扞事未  
詳出處然二公俱死睢陽之難祀於睢如張許二公雙  
廟宜也顧皆祀黔何與今江湖之神例祀張睢陽亦其  
類

宋張忠文公叔夜招安梁山灤榜文云有赤身為國不  
避兇鋒拏獲宋江者賞錢萬萬貫雙執花紅拏獲李進

義者賞錢百萬貫雙花紅拏獲關勝呼延綽柴進武松  
張清等者賞錢十萬貫花紅拏獲董平李進者賞錢五  
萬貫有差今關葉子戲有萬萬貫千萬貫百萬貫花紅  
遞降等采用叔夜榜文中語也又傳中方臘賊黨呂師  
囊台州仙居人亦非杜撰但賊所陷乃杭睦歙處衢婺  
六州耳詳泊宅編又七修類稿言錄鬼簿元汴梁鍾繼  
先作載宋元傳記之名而於此傳之事尤多

予嘗記揚署貞鸞事適觀朱近修一是義鶴記異焉審

山周氏者畜鶴二順治乙酉周闔門死兵掠鶴去鬻溪  
上陳氏其雄哀鳴不食死雌不偶他雄一日翔於野見  
審山浮圖百里外飛赴之徘徊浮圖下三日周之遺僕  
某聞而往觀鶴望僕踊躍投懷不去遂攜以歸始供魚  
不給繼粟又不給鶴自投竈下飼其飯啄餘粒或竟日  
饑毛羽凋敝終不他去觀者皆太息或泣下云

閏五月初五日

御試翰林官於

瀛臺自內閣學士以下其以翰林改卿寺者亦與焉試

理學真偽論豐澤園賦各一篇

豐澤園在瀛臺即明之幽風亭也

初七日內閣九卿赴

暢春苑敬觀

御書嵩岳濟瀆廟大禹廟孟子遊梁祠額前歲恭請未允至是始頒發云

予嘗疑傅頌公友德之賢中山而外無與倫比其平滇平蜀功尤最諸將而卒不免猜忌以無罪死古來功臣

之寃未有如潁公之甚者公宿州人予嘗過宿憑弔而

悲之賦詩云躍馬千山外呼鷹百戰場平蕪何莽蒼

上聲

雲氣忽飛揚寂寂通侯里沈沈大澤鄉潁川湯沐盡空

羨彫頤王陳涉亦宿人漢高帝猶為涉置守冢以潁公

之賢且有大功於明而食報顧遠不逮涉故悲之也適

讀海寧朱一是所作傳潁公傳後記略云洪武末胡藍

二獄之後舊臣宿將有方面之勲者惟潁公宋公

馮勝

在

而宋公將略不及潁公心之純白亦不及潁公也潁公



開平後一人耳高皇帝必欲去之者何故其時帝春秋高皇太孫幼不無漢景疑亞夫之心然潁公死而少帝之長城壞矣漢高殺功臣與高帝類然猶能存周勃陳平定呂氏之亂而高帝不能存一潁公以拒靖難之師其始之深防過計凡以為少帝而少帝適用此亡雖貽謀之不善要之有天意焉天命在太宗欲不亡少帝不可得也天欲亡少帝欲不殺潁公不可得也鄭曉吾學編國書之善者也別潁公於宋公列諸名臣悼潁公之

為純臣也又云考其過惡欲文致而無從甚其誅尸并  
贈卹而不及所謂兔死狗烹鳥盡弓藏讀書尚論者不  
能不撫膺流涕也此論痛快淋漓可為萬古不易定案  
三代之所以直道而行也

世人作詩文沿襲謬誤而不察如稱曹操曰曹公稱漢昭  
烈反曰劉備予前已斥言其非又如桓溫晉之逆臣子  
玄篡位偽謚溫宣武皇帝劉義慶世說既有此稱後人  
因仍不改皆曰桓宣武竟忘其為亂賊偽號可怪也玄

又嘗上溫廟號曰太祖然則後世亦可稱太祖耶

湯若士先生玉茗堂亂後久燬兵火門人常熟陸輅次  
公通判撫州捐俸錢即堂址重新之落成日徧召太守  
以下諸同官泊郡中士大夫大集堂中令所攜吳伶合  
樂演牡丹亭傳奇竟夕而罷自賦二詩紀事一時江右  
傳之多屬和者

楊正經字懷玉蜀人其先酉陽宣慰司土官也及身為  
將通音律善鼓琴崇禎中修復雅樂或薦之召見稱旨

出內府漢文帝唐太宗二琴賜之官太常癸未以母喪  
歸蜀奉賜琴以行次旅舍懸琴壁間鏗然有聲者三正  
經泣曰此亡國之徵也不再臘矣是日李自成入潼關  
明年甲申明亡正經僧服時抱賜琴出遊吳楚間人呼  
為僧太常云

汪希文歛人少遇尹髻頭隨侍甚久一日遣歸曰子有  
世緣逢高則止予一錢握之掌曰饑即視此後十年見  
我於姑蘇希文辭去自是每思食輒有十許錢涌出掌

中轉徙數郡至高淳家焉及期往姑蘇待尹尹至喜曰  
子信人也留旬餘授以黃白之術曰助子濟生利物希  
文拜受試良驗輕財好施里人德之一日尹忽過之語  
曰後二十年待子於南嶽希文年七十五忽出其書盡  
焚之曰勿誤後人沐浴正襟而逝

魯顛不知何許人獨行吳越間體上裸披單大襍襍中  
圓一孔足跣而跳攜一龜為伴顛俛首龜昂鼻呼吸相  
接時踞地展襍引頸出孔伸縮之像龜行行市上羣兒

狎而笑之性喜酒或予之酒則鼻飲之夜必倒懸橋梁或睥睨間酣臥甚適人伺其浴乃俯水面盡飲前浴者之垢而不去已垢一日至松江羣兒譟之知府方岳貢以為惑衆予杖杖下而顛死後有人見之於杭州

年康民內江人少遇異人能前知隱居青城山中萬歷末上書當道曰辛酉九月蜀當有變平之者朱方伯變元也已而奢酋據重慶為亂如所言賊將寇成都朱詣青城見之康民已候於塗叩之曰奢酋至成都乎曰至

矣十日耳圍城乎曰圍百有五日可守乎曰成都不可  
守然有公在亡慮公二十年鎮撫西南功比韋南康問  
天下事何如曰北都王氣盡矣其後朱總督西南康民  
寄書云沐猴而冠者與公作難熊據其險助之為虐幸  
聖明在上必無虞也已果為楚人劉宗祥所劾大學士  
王應熊主之事尋得解

康熙三十三年春季戶部進支過在京及八旗俸銀數  
目黃冊親王郡王以下滿漢文武官員共一萬二千二

百四十一位員共應支銀五十九萬二千七百三十八兩有奇

十五日再恭觀

御書於午門

即嵩岳濟瀆等四扁額用龍箋重書

明日五鼓赴

暢春苑公請勒石太學未允

賜巡撫山東副都御史桑格

御書政尚清簡四大字又

御書黃庭內景經及



御製趵突泉詩

賜巡撫直隸副都御史郭世隆

御書端方二大字

御書綾字一幅

御書

御製詩畫路路清廉圖宮扇一柄

翰林院掌院禮部尚書張英吏部右侍郎常書等題為

欽奉

上諭事康熙三十三年五月十七日臣等奉

上諭朕流覽載籍見分類諸書雖各有所長尚多未備  
唐類函可謂詳瞻然唐以後典故藝文亦未採錄可依  
唐類函體例自唐迄明輯成完書以資觀覽欽此欽遵  
仰惟我

皇上聰明天縱問學淵涵接堯舜之心傳發典謨之奧  
義右文稽古超軼百王于六經四子歷代史籍通鑑綱  
目性理諸書以及諸子百家之言靡不表彰闡發昭垂

日星矣復念分類之書所以備考索資聞見實為有益而體例詳贍唐類函為最但以其採錄止於唐初而五代以及宋遼金元明典故藝文闕焉罔續

特諭翰林諸臣分門接輯補前代之缺略煥

本朝之巨觀益見我

皇上廣稽博考好學不倦之盛心蓋無微不至也

臣等

謹遵

諭旨分屬諸臣纂修自唐迄明典故藝文博收精擇依

類附入俟編纂成稿之後恭請

皇上睿覽裁定賜名併

御製序文冠於卷首不獨黼黻

昭代亦以嘉與千秋有裨文治誠非淺鮮也其總裁分

纂各官俟

命下之日開列具題

惠州西湖志載閨秀孔少娥絕句云西湖西子兩相儔

湖面偏宜點翠洲一段芳華描不就月灣宛轉似眉頭

少娥字文淑歸善人歸士人劉少唐

芳華洲名  
明月灣名

吏部題明翰林官出為京堂者遵

旨遇翰林缺出仍行開列太常卿府尹光祿卿太僕卿  
左右通政大理少卿陞內閣學士太常少卿太僕少卿  
鴻臚卿督捕理事官府丞陞少詹事通政司叅議光祿  
少卿陞侍讀侍講學士鴻臚少卿陞春坊左右庶子然  
翰林品小而衙門清切實難與卿寺較品級也

前卷言一藝之工足以成名而歎士人有不能及偶觀

袁中郎集時尚一篇與予說略同并錄之云古來薄技  
小器皆可成名鑄銅如王吉姜娘子琢琴如雷文張越  
磁器如哥窑董窑漆器如張成楊茂彭君寶士大夫寶  
玩欣賞與詩畫並重當時文人墨士名公鉅卿不知湮  
沒多少而諸匠之名顧得不朽所謂五穀不熟不如稊  
稗者也近日小技著名者尤多皆吳人瓦壺如龔春時  
大彬價至二三千錢銅爐稱胡四扇面稱何得之錫器  
稱趙良璧好事家爭購之然其器實精良非他工所及

其得名不虛也云云予又曾觀顧東江集弘正間舊京  
製扇骨最貴李昭七修類纂天順間有楊埧妙於倭漆  
其漂霞山水人物神氣飛動圖畫不如常上疏明李賢  
表彬者也

西溪叢語洛陽董氏蓄一雷琴中題云山虛水深萬籟  
蕭蕭古無人蹤惟石嵯峨四語不減東坡空山無人水  
流花開予嘗喜古水仙操敘事絕妙而琴曲有聲無意  
義欲以此補之

王彪之閩中賦云簣簴函人齊民要術注云簣簴竹節  
中有物長數寸似人形相傳云竹人竹人之名較楓人  
尤奇又五色線言馬均削竹作人能語須臾而雨是別  
一竹人也

吳周昭著書稱五君顧邵諸葛瑾步騭嚴畷張承在嵇  
阮五君之前

三齊謂即墨臨淄平陸

三齊記

又齊濟北膠東

田榮并三齊之地注

四齊膠東膠西濟南齊

漢五行志注一條并小學紺珠



聞喜之裴有中眷東眷西眷之別如他姓所謂某房也  
五代史則云居燕者號東眷居涼者西眷居河東者中  
眷唐書宰相世系表以休度皆出東眷然度即聞喜人  
休乃嘉興人與燕皆無涉又何也又韋氏潛號西眷穆  
號東眷以眷稱者祇此二姓耳

甲戌閏五月廿五日慈仁寺市上得女史瓊如擘窠大  
書李白登華山落雁峯云云凡三十三字筆勢飛動不  
類巾幘粉黛中人末題瓊如二字小印朱篆文二字同

不知何許人也

往見魯公所書麻姑壇記皆小字甲戌夏景陵吳既閑

驥

之子鼎彥來京師求作其父遺集序遺予麻姑壇記

大字末云奉議大夫建昌府知府梁伯達重建按集古

錄跋麻姑壇記云顏公忠義之節皎如日月其為人尊

嚴剛勁象其筆畫而不免惑於神仙之說謂此書也別

有小字麻姑壇記一跋云右小字麻姑壇記或疑非魯

公書余家所藏顏氏碑最多未嘗有小字者惟干祿字

書注最為小字而體法與此記不同蓋干祿注持重舒和此記遒峻緊結尤為精悍此所以疑之也及把翫久之筆畫巨細皆有法度愈看愈佳然後知非魯公不能書也陸務觀云魯公麻姑壇記有大小二本蓋用羊叔子峴山故事都元敬金薤琳琅引柳待制道傳云麻姑壇碑小字楷法尤精緊比聞舊石焚毀山中重刻無復筆意亦以小字為顏書但謂石已不存非也吳文正云麻姑碑在吾鄉舊為雷所破重刻至再浸失其真則被

焚者乃臨川大字本而南城之石至今固無恙也云云  
今大字本蓋臨川舊石燬後梁君重刻於建昌者草廬  
所謂浸失其真者是也

集古錄跋沈傅師道林嶽麓寺詩云唐侍御姚員外二  
人之詩不見不知何人按侯鯖錄姚詩不復見之今得  
唐侍御詩題云儒林郎監察御史唐扶其詩即所云壁  
間杜甫原少恩者也此篇與崔珣韋蟾諸篇俱載楊用  
修集永叔顧未之見何哉

石林詩話載魯直自戎州歸荆南高荷以五十韻見魯直極愛賞之有詩云張侯海內長句晁子廟中雅歌高郎稍加筆力我知三傑同科張謂文潛晁謂無咎也無咎聞之頗不平荷有雲臺觀詩云親祠聖主鸞曾駐善夢先生蝶不歸見范公稱過庭錄晚得蘭州通判以死頃見張吏部扶長泰來作江西宗派圖錄高荷有傳而太略應補入之

予觀唐末詩人如羅隱之流多流寓江南吳越荆蜀諸

國卽全唐詩話唐詩紀事所錄不下數十人因作五代詩話頗自斐然葉少蘊避暑錄云唐自懿僖後人才日削至於五代謂之空國無人可也然浮圖中乃有雲門臨濟德山趙州數十輩人卓然超世是可與扶持天下配古名臣苟得一人必能成一事然後知其散而橫潰又有在此者也歐陽公云天地閑賢人隱予謂五代非盡乏賢也特不以為將相守令耳

于奕正司直金石志止云酈炎碑在長白山東而不載

醴泉寺寶誌及相公山景範二碑予前卷既詳著二碑  
之文以存故實然竊疑寶誌公不應有碑像在此夏日  
偶觀洛陽伽藍記乃悟後魏別有一寶公非誌公也伽  
藍記云沙門寶公者不知何處人也形貌醜陋心識通  
達過去未來預覩三世發言似識事過之後始驗其實  
胡太后問以世事寶公曰把粟與雞呼朱朱時人莫之  
能解建義元年后為爾朱榮所害始驗其言蓋以寶公  
號同因謠為誌爾然魏之寶公踪跡至長白與否亦無

所考據矣

金粟木陳忞公順治末應

詔入京賜號宏覺國師南還至淮上與諸當道酬酢氣  
燄烜赫從者如雲為諸方口實常一至金陵其弟子某  
供張輒數百金至稱貸以應康熙乙巳予謁花山見月  
律師師戲額語予云渠習中面上只有國師大和尚五  
字頃棲霞楚雲禪師亦云今高僧名衲所至招搖銜鬻  
以要觀聽有司關防甚如巨猾謂忞也然洪覺範言南



還海岱逢佛印元公出山重荷者百夫擁輿者十餘夫  
巷陌聚觀喧吠雞犬佛印為坡公所喜而行徑如是于  
恣公又何責焉

歐陽永叔最愛常建曲徑通幽處禪房花木深之句固  
是絕唱具眼或謂永叔在青州手書此詩於廨後山齋  
通字乃作遇有石本若然則是點金成鐵初不解此詩  
之妙也

漢酈食其審食其皆音異基惟趙食其音如字不知何

義 衛侯名辟疆周行人曰啓疆辟疆天子事也衛侯  
因改名燬顏師古音壁強言辟禦強梁也陸氏音義從  
之齊宣之名亦必同義右二條曹縣郭一經字學三正  
云

王肯堂筆塵云隆慶中古長城圯中有小棺無數人形  
衣冠儼然皆長數寸一僧棺中有梵字經一卷一婦人  
有銘旌曰某王某妃之柩吳中兵備徐節親見之近甘  
涼間築城亦有此異

小說載司馬才仲夢遇蘇小事按懶真子才仲名棧文  
正公姪孫也嘗過澄城九龍廟廟止有一妃土人相傳  
是馮瀛王女才仲戲題詩云身既事十主女亦妃九龍  
與其弟才叔樵皆豪傑之士咸不四十而卒樸字文季  
其雁行也

居易錄卷二十四